

de la peau de la teste qu'ils emporterent avec le poil, la fentinelle ayant donné aduis, on décharge des fusils sur eux, ce qui les contraignit de se retirer, croyant que ce pauvre homme estoit mort, en effet il n'auoit plus de mouuement: mais comme on eut mis le feu au canon pour le décharger sur les ennemys, il s'éueilla & commença à se traifner, on court vers luy on le trouue bleffé à la teste de 7. ou 8. grands coups de hache d'armes que tout le monde croyoit estre mortels: vous euffiez dit que les yeux n'estoient plus en leur place & le sang qui le trempoit de tout costez [67] le rendoit horriblement affreux; ayant vne partie de la teste découuerte de son poil & de sa peau, on l'appelle, on luy parle, il n'auoit plus de connoissance tous ses sens estoient perdus, il n'auoit plus qu'un mouuement animal qui le faisoit traifner cà & là sans raifon, le Chirurgien l'ayant fait porter dans le Fort, en eut un si bon soin qu'il est maintenant en pleine santé: il fut trois iours sans aucune connoissance, & un fort long-temps en danger à cause que le crâne estoit enfoncé & que les contusions estoient fort grandes. Depuis ce temps-là les François auoient pour cloistre vne pallissade de pieux d'une bien petite estenduë; mais enfin les Ambassadeurs Iroquois arriuant au commencement de Juillet, rompirent la closture de ces pauvres reclus, qui n'ayant pas tous le don d'Oraison ne prenoient pas trop de plaisir en un si petit monastere.